




道光甲午春

少雨齋



天籟軒藏板

天籟神齋殊

小香閣

蘇家甲子齋



余素不習倚聲而
好讀北宋詞以其
豪壯可喜也壬辰
小唐來都晤談



聞出所著詞存一
冊相證讀之神為
一爽知其沈酣於
此者久矣為識數

語而歸之

季秋之月望日友
生英和書於邈流
垂蔭之居



題辭

廿年離夢快相逢
燕市豪情如昨放
眼千秋人世上幾
許風花開落鐵笛
工愁銅琶寫怨好
把吟懷拓小紅低
唱中書肯換歌曲
休論蓬島棠封彩
毫搖襞處霞舒
雲簇箋翰橫飛蠻
傲外多少弓衣繡
錯玉局風流金荃
才調那許緇塵著
試翻新弄繞梁聲
振林木

歸安葉紹本筠潭

青紫喜同岑宦轍
分程蓬飄萍聚又
春明羨煞清狂渾

不減那讓耆卿 我亦易縈情塗抹無成秋窗讀罷愛
新聲便欲留君天上住高唱濃斟

桐城徐 鏞詠之

詞客前身謫仙今日酒酣能不悲歌江湖魏闕人事別
離多多少少悽酸感慨都譜入激楚陽阿拈豪處聲偷字
減秦柳問如何 消磨情萬種卅年一霎駒影蹉跎只
贏得新詞一卷爭哦我亦名場落拓回頭認春夢成婆
差喜見天涯同調黃絹幾摩挲

烏程戴鼎恒春義

夢得才華海內知清真一卷幼安詞編名獨校蕢洲譜
撫實還同本事詩聞嶠月明吹玉笛滇池花發寫烏絲
與君白髮相逢晚惆悵京西欲別時

江都汪全泰大竹

楊柳曉風輕天籟泠泠絕無綺語到澄襟回首昔年天
上住歌詠昇平 滇海展雲程仙呂頻賡江州司馬最
多情此去鑑湖山色好酒國詞人

固始吳俊民醉生

天籟泠泠鷓語咲檀板敲殘句壓詩囊重瑤竽頻斟金
硯捧瀛洲重話游仙夢 棠蔭曾聞溟海頌放櫂山陰
唱入雲無縫他日詞人旌節擁才名不讓桐花鳳

固始吳葆晉紅生

十洲三島幾經過曾賦霓裳奏大羅莫道引舟風力勁
蓬萊清淺近如何

碧雞金馬停鞭訪鏡水笄山放櫂看不爲天涯感淪落

青衫一樣淚闌干

不學蘇辛不柳秦成家何處問傳薪因知下筆皆天籟
彈指於今有替人

我亦清狂憶昔時新聲製就寫烏絲何當共覓旗亭醉
賭唱黃河遠上詞

聽紅牙一聲低拍俗塵萬斛都洗曹娥江畔停舟處黃
絹共題碑字簫可謚賸縷縷芳情收拾篷窗底更誰知
已悵載雀三山栽花六詔聊把舊游記 從頭數秦柳

蘇辛曾幾諸家何者堪擬飛揚跋扈詞場上飄盡平生
涕淚春夢裏但紫綺烏紗大抵銷英氣冷吟殘醉算水
上琵琶天涯芳草猶有可憐意

吳縣石同福敦夫

競詞場紅牙鐵板蘇辛秦柳分派文章千古無軒輊佳
妙並皆天籟清論邁譜萬疊宮商金管烏絲界新聲更
快寫燕趙悲歌江山壯氣羞我女郎態 神仙概本是

蓬萊舊客

借上聲讀

遨嬉萬里而外昆明池水西湖月都入

小奚詩袋君莫嘅君不見鷓夷一舸耽鰕菜有山可買
便觴詠流連竹絲陶寫奚慕好官大

歸安張應昌仲甫

樂府翻新拍費才人尋聲選韵幾拋心力顧曲由來知
音少唱遍曉風殘月應不讓屯田柳七譜入紅腔成絕
調又何須別派論南北刪綺語證仙骨 蓬萊回首層
雲隔恁無端雙鳧飛落塵寰小謫犵鳥獐花添詩料付
與奚囊收拾儘贏得清呼一葉鏡水而今歸行部領湖

山好待追蘇白名刺史舊詞客

桐城方 秉珊洲

霓裳小輟大羅天仙吏仍裁百幅箋
咲我風塵損清興
檀痕罷指又經年

早向天南詠宋梅真仙奚必住蓬萊
近詞彌覺聲悲壯
收取松濤禹穴來

陽湖陸繼輅和孫

霞軒鶴舉萬里支笳載奚囊如許豪情柔緒渾未減都

付碧筩金縷蓬萊小住記曾聽鈞天新譜
經幾番傷別
傷春換得鬢絲無數
煙波好共勾留趁萬綠西泠蘭

權容與尋梅訊柳卻喚起湖上新盟
鷗鷺何郎漸老還
傳遍春風詞句等恁時寫入冰絃
訴與小窗風雨

陽湖崔曾益仲遷

如此清才渾不減屯田柳七當綺歲蓬萊
便到花生彩
華好句早傳天上遍真仙偏向人間謫
數游蹤金馬碧
雞遙王尊叱
溟池水心同潔
杭州酒襟還溼更閑情

慣愛偷聲換拍樓指幾人丹九轉傾心此事肱三折算
雙鬟賭唱合輸君旗亭畫

溧陽宋 鎮北臺

籍籍聲華海內傳頭銜早領玉堂仙
棊軒雅化曾留譜
蘭畹聯吟共拂牋半抹微雲秦學士
一痕殘月柳屯田
西泠春水年年綠未了三生石上緣

甯化伊念曾少沂

小庚詞存卷一

起乙丑迄丁亥

閩中葉申薌維彧學拍

念奴嬌

東坡先生生日集何氏紅園

乘風歸去笑髯翁本是神仙中物七百餘年仍不死笠
屐圖來滿壁磨蝸身宮螯龍詩案往事成鴻雪一場春
夢名垂身後猶傑 卻喜東閣何郎紅園雅集詩興尤
清發一瓣香爲坡老燕耿耿芳懷難滅臘酒珠紅嶺梅
玉粲凍雨絲飄髮舉觴爲壽祝公千古明月

滿庭芳

嘉興遇雪遲同伴不至

極目天垂打頭風峭同雲一望瀾漫高低近遠凍雪未
曾乾生怪天公多事殷勤把玉戲重翻連朝裏幾番做
作釀就十分寒無端剛賸得詩敲韵險量入杯寬但
孤吟獨酌終不成歡寒已做裘侵透難禁是酒醒更闌
青綾被羈眠易覺夢不到家山

摸魚兒

東阿阻雪

最無端昨宵風雨偏將寒月吹去輪蹄歷碌剛過半喜

把來程暗數翻又住算難事人間難莫如行路問天不
語更費盡工夫裝成玉戲六出舞飛絮男兒志堪笑
儒冠多誤浮名肯把人如酒闌欲擬鷓鴣賦多少壯懷
誰訴拚醉舞從吾願此身願化陶家土休論甘苦但塊
壘須澆醉鄉頻到此外少佳處

沁園春

自題二樂圖

蠹可成仙翹亦稱神

白詩翹神
寅日合

奇乎未奇但擁將萬卷

百城何假飲堪一石卮酒安辭惠子五車平原十日樂

在其中奚復疑從吾好便曹倉高築仲榼常攜 古人
糟粕誰知笑賢聖還憑清濁爲倘五經饋至吾應束帶
一甌借得我且垂帷文字生涯醉鄉日月消受清閑事
事宜君休笑任相呼醉漢或日書癡

臨江仙

十載江湖常載酒等閑孤負春風莫愁湖畔板橋東垂
楊千萬樹何處繫花驄 爲愛綠窗人似玉卿偏憐我
情濃翻教恨晚惜相逢清歌聽未已離夢又匆匆

念奴嬌

狂歌

麴生知己笑憑伊澆盡胸中塊壘雲夢眞堪吞八九何
物還能芥蒂鼻倩談諧幼輿任達甚矣吾狂矣人生行
樂及時宜自畱意 也解筵畔評花尊前顧曲學作逢
場戲但得百年開口笑此外不知餘事白眼閑看素心
誰是閱盡人間世唾壺敲缺短歌無復宮徵

菩薩蠻

好花開處原非易看花須惜憐花意花亦解人憐臨風

花自偏 酒徒狂態作翻道花情薄對酒碎花枝此情
癡未癡

金縷曲

落花

命莫如花薄歎年年一番春盡一番漂泊孤負東皇栽
培意生受封家惡劇況更有許多做作飛上錦茵能有
幾但吹來藩溷真無著回首視孰清濁 紅嫣紫姹何
如昨想都因未除結習俗緣難卻琪樹瓊花神仙品一
染紅塵便錯空悵望蓬瀛樓閣此別鈞天成小謫也有

人說道人間樂身世事杳難託

沁園春

辛未改官後乞假歸省留別芷汀六兄並
題洪江送別圖

憶丁卯冬買洪塘舟與君共登笑棘闈再試初欣霓詠
蓬山一到旋被風驚五度星霜三經離別況此還爲萬
里行重披視正人歸海嶠心戀春明 壯游若快平生
但怕聽陽關第四聲念觚稜曉日瀛洲獨步珊瑚夜月
洱海孤撐 珊瑚撐月乃
滇中故實 好繼家聲來持使節慰我蕭然
遠宦情頻回首想西堂詩夢別後常縈

滿江紅

九日出都畱別楊蓉峰前輩李蘭卿舍人

地角天涯誰禁得幾番離別爭柰是銷魂況值薊門秋色握手沈吟忘語笑回眸頃刻成睽隔盼道旁憔悴柳絲黃難攀折聚與散如萍迹往復返真駒隙但驪歌一唱此情何極綠酒好畱他日醉青衫已爲今朝濕慰相思惟有月當頭同南北

沁園春

淮上畱別次幔四兄

別三神山作萬里游斯真壯哉笑八年在外慣嗟行役

一行作吏暫賦歸來誰念王孫難逢漂母頻過淮陰古釣臺相逢幸正漫停征櫂共把離杯家園嶺嶠長淮並燕北溟南各一涯念何時夜雨聯牀共話每逢佳節對酒遙懷底事年來吾家兄弟碌碌偏多百里才交相祝是潘輿迎奉同慶南陔

滿江紅

壬申九日壘前韵

去歲今朝記曾是燕臺分別萬餘里飄然來看九峰山色紫蟹黃花風景杳碧雞金馬關山隔歎每逢佳節倍

相思腸應折 賓客少無游迹簿書簡多餘隙笑直須
臥治清閑已極高會遠懷寄厰勝荒居絕類湓江溼問
愁城自昔酒兵降今將北

水調歌頭

癸酉送同年戴春溪舍人差旋

遠宦萬餘里落拓寄南荒故人持節遙至相遇碧雞坊
未作臨邛負弩且學都官分校玉尺共評量君返鳳池
去重與奏明光 應念我宦情減旅愁長山城斗大滂
說彭澤與河陽京邑舊游相問爲道狂奴故態今也不
成狂回首望霄漢分手悵河梁

鳳凰臺上憶吹簫

菜花

粟影疑空麥雲訶薄凝眸一望千畦儘臨風錦爛映日
金迷爲愛淺深濃澹平分出近遠高低春如許黃花滿
地莫認秋籬 參差麴塵吹動正陌上人歸色蘸春衣
記年年佳節長說挑時試問題詩張翰風流句端合因
伊還相笑芳根咬處此味誰知

又 白芍藥

素魄籠煙豐膚膩雪亭亭玉立春風豈洛川微步姑射
仙蹤彷彿趙家姊妹新妝竟齊倚簾櫳還應是楊妃出
浴豔冠驪宮 形容難摹丰韵笑謝眺當年祇詠翻紅
任廣陵嘉謔金帶奇逢爭似盤盂琢玉坡仙語比擬偏
工蓮香白芳名記取色相皆空

木蘭花慢

袁季範水晶簾下看梳頭圖

袁絲今老矣看故態尙踈狂愛畫閣春風湘簾曉日坐
對吳娘新妝笑臨鏡檻縮雙鬟斜掠鬢絲長巧樣靈蛇
學就妖姿墮馬偷將 回廊花影罨垂楊風送綠雲香
倘芳卿我見猶憐娥媚何況伊行端相天然丰韵便虬
髯臥看也無妨看懽任誇京兆風流不讓王昌

又 秋湖送別圖

人生行樂耳得閑處便宜偷柰小別逡巡柔腸繾綣欲
去還休芳游暗攜翠袖擬都將離恨載扁舟鏡裏波添
眉黛酒邊風助歌喉 情稠千種意綢繆一樣思夷猶
悵金烏影墜碧雞路近雲散風流新愁頓生萬斛倩琵琶

小庚詩存
琵琶彈出水天秋綠鬢韋娘初嫁青衫司馬難留

沁園春
送秦馥堂司馬領運

辭雲中君歌蜀道難勸君莫嗟看奏最三年兼逢奉使
離官萬里快且還家白帝城高黃牛灘陡此去眞乘八
月槎樓船壯盼亭登至喜穩下三巴 亭亭玉樹堪嘉
愧如許頭顱湯倚葭羨祿養承歡捧來毛檄弱齡作宰
裁遍潘花首薦新叨頭綱獨領試問歸期再及瓜歸來
日是 九重恩賚五馬榮誇

滿江紅

碩致堂別駕黑龍潭看梅圖

丰度翩翩問驃騎何如第五況復是士元驥足早看展
布需次十年秦塞久馳驅萬里滇池阻賸閑來游歷好
山川開襟處 潭百尺龍深護梅千載花初吐正微吟
把卷翛然天趣羨爾閑身邱壑置嗟余浪迹風塵苦擬
何時同躡筍鞵青眠花塢

一萼紅

已卯四月初度

笑奔波忽平頭四十歷磔隙駒過萬里攜家三年宰劇

虛將心緒消磨邇來是宦情都澹爭禁得半載病爲魔
酒瓊生踈吟懷蕭索興致如何 回首舊游天上悵仙
山縹緲落溈風多溈海塵勞蜀江瘴癘榮枯寵辱由他
憶香山著緋司馬也曾嘲官職未蹉跎
白詩四十著緋
軍司馬男兒官
職未蹉跎 況我頭顱如許且自婆娑

滿庭芳

潯陽琵琶圖

詞客牢騷美人遲暮情懷一樣無聊悲秋傷別無那可
憐宵忽憶青樓舊夢都付與慢撚輕挑鄰船客尋聲暗

問移舫近招邀 誰描愁萬種風鬟霧鬢老大萍漂休
提起當年一曲紅綃我亦青衫司馬重題處也爲魂銷
應念是天涯淪落同寄恨迢迢

水調歌頭

辛巳初度題黔南驛壁

回首過來日四十二年非半生俯仰隨俗名利兩相違
萬里遠飛鳧鳥十載重瞻 鳳闕舊夢總依稀惆悵再
來燕仍向社前歸 青綾被紅綾餅更休題腳鞢手版
未卜何日息塵機瘴雨炎風天氣茆店筍輿滋味辛苦

復奚辭也解歸休好何以慰朝飢

滿庭芳 高郵遇雪

病骨闌珊旅懷蕭瑟十年又過秦郵迎春送臘兀坐對
扁舟連日嚴陰釀雪侵尋是寒透重裘因風絮晚來更
急堆積滿船頭 寒流流漸澀輕橈過處玉碎瓊浮凌
潛聽琤琮細響常留只恐宵深凍合歸舟阻羈思難收
私相禱晴帆高掛明日到揚州

又 壬午人日過梁谿題韻香道人空山聽雨圖

秀格簪花生綃寫蕙年時曾仰芳名梁溪雪權快得遇
飛瓊爲我含豪呵凍素牋上墨妙縱橫攜來是湘香滿
袖傳翫遍江城 忘情偏愛此空山獨坐聽雨圖成想
聞根參透萬籟俱清猶恐塵心未盡菩提水淨洗光明
蒲團畔泠泠幽韻常答步虛聲

漁家傲 羊城留別芷汀六兄

水驛山郵經歲度匆匆又別珠江去江上木棉花正吐
千萬樹紅雲遮斷羊城路 波面漂萍風裏絮游蹤宦

小序詩在
跡渾無據十載分離旬日聚腸斷處鷓鴣聲急斜陽暮

永遇樂

和魏贊卿司馬詠萍

漠漠楊花東風吹到添半池翠細點星疎柔茵錦滑蕩
漾圓還碎隨波容裔偷遮山影一碧侵人脊際傍苔磯
平鋪似掌礙他釣艇垂餌浮蹤若寄升沈聚散付與
半篙新水魚唼頻吹蜻飛小立鴛浴根翻紫去留無計
爭如蕤菜慣惹秋風鄉思斜陽外菱塘蓼嶼籍伊點綴

鳳凰臺上憶吹簫

重游廣西州東湖

艇泛瓜皮波揩菱面重游也屬相宜看蒲縈翠帶蓮褪
紅衣蕩入綠雲深處沿堤去催喚漁師鳴榔過千絲細
網出水魚肥忘機傍人鷗鷺每篙影輕搖還自驚飛
忽片雲頭上急雨催詩叢葦高荷送響涼衫上煙靄霏
霏歸來後寺樓風定鴉背光低

滿江紅

重臺紅梅

茜雪飄香已占斷羅浮春色幾曾見南枝放處重攢五
出競爽讓他蓮蒂竝同心疊抱丁香結想雙聲絳樹是

前身方修得 點不盡深宮額吹不斷江城笛宛暗香
踈影垂來的的染翰好憑雙管手簪花恰似連珠格向
石湖譜外數奇胎真佳絕

滿庭芳

綠萼梅

染黛嫌濃銷冰訝薄春波淺蘸芳魂天寒修竹翠袖倚
無痕烏羽襜褕遙映羅浮夢好與溫存橫斜影巧偷苔
暈清絕月黃昏 前身憐應是仙人萼綠小字同新數
頭番花信略較逡巡倘向含章點額撩雲鬢鈿碧輕勻
東風惡一簾花雨腸斷墮樓人

水龍吟

水仙

是誰微步凌波娉婷顧影東風裏額黃明澹珠璫搖曳
冰綃雪袂韻比蘭腴品同荷淨天然娥媚向春前臘底
評量花信都說道三番是 題就梅兄磬弟玉玲瓏更
饒風致清泉白石花瓷髹几山齋位置風透重簾微聞
薌澤粉濃脂膩翻教人勾起閑情多少憶鶯花地

木蘭花慢

紅山茶

譜滇南花卉推第一是山茶
菱枝偃虬形苞含鶴頂烘
日蒸霞榼杈高張火傘笑
粵姬渾認木棉花葉幄垂
垂綠重花房冉冉紅遮
仙葩種數寶珠佳名竝
牡丹誇憶吟成百詠記稱
十絕題遍風華生涯天然
爛漫自臘前開放到春
賒風定絳雲不散月明
頰玉無瑕

念奴嬌

謝王協戎惠巧色菊

重陽近也學淵明閑探
黃花消息恰好江州王
刺史送到幾株秋色黃
如鵝翎白欺蜨粉紫豔
分鴛翼攜尊相

對不妨長醉花側
正待細把餐英驚看
朵朵巧樣爭偷得誰料
夜郎荒僻地忽覩名花
傾國倩女雙魂徐妃
半面鴉髻三丫擘傲他
五柳昔年當未曾識

滿江紅

丙戌初到大關作

斗大山城居然是滇東
鎖鑰千餘里襟黔帶蜀
犬牙相錯狇鳥蠻花風
景異爽僮爨女夷情樂
沐承平雅化百年來安
畊鑿輿馬困山程虐舟
楫險溪灘惡笑蠶叢
鳥道崎嶇猶昨田壘樓
梯窗際列泉通竹規厨
中落對

邊關斜日起新愁聽笳角

金縷曲

游宦成羈旅問當時誰人投筆誰人誓墓笑我頻年牛
馬走依舊頭顱如許休更憶金閨故步萬里攜家從薄
祿又那堪千里拋家苦離思積向誰訴 愁來難覓高
陽侶鎮無聊編籬穿沼移花栽樹敢學魚湖同鹿柴運
蠶湯消閑緒但可惜流年虛度曾道銷魂緣賦別恨而
今魂也無銷處空悵望碧雲暮

又撫琴圖

梧竹清陰繞對庭軒瑤琴獨撫是何年少濯濯丰姿憐
張緒蓮幕蜚聲偏早託雅趣絲桐深妙莫奏高山流水
曲自鍾期去後知音少但目送孤鴻杳 披圖細揣君
懷抱想當時文君未遇偷彈新調欲寄琴心求凰意盼
得遠山眉好況恰有雙鬟來到笑我忘情何所好學淵
明祇愛無絃操詞題罷尊頻倒

清平樂

小序詩在
濃雲翻墨遮卻青山色萬變圖成真頃刻草莽魚鱗誰
識 須臾雨散雲空碧天千里光同閑倚闌干四望依
然翠錦屏風

點絳脣

繞屋青山屏風十二週遭綠峰重嶺復拄笏閑延矚
最是宜人雨後山如沐新妝束嵐光翠撲箇箇雲鬟轟

臨江仙

陣陣輕雷催驟雨曉窗快覺涼生坐聽檐溜雜泉聲小

庭苔逕沒新沼鳴闌平 階竹枝垂青到地短籬瓜蔓
輕盈遙山隱隱近山明浮雲馳倏忽飛瀑落縱橫

蜨戀花

蟬

庭院陰濃消暑氣忽帶蟬聲便有山林意雨後風前聽
未已纏綿最在斜陽裏 飲露棲煙仙骨蛻品格清高
會伴金貂隊獨有長吟無限思秋來慣惹新愁起

永遇樂

秋夜不寐

秋後關山月斜衾枕皆斷腸處露井啼螿霜霄過鴈更

小序詩在
湊淒涼趣銀釭珠穗寒花半吐起坐欲挑還住湯思量
酒徒狂態而今鬢影如許 無端夢裏悲歡聚散又被
鄰雞驚去薄宦飄零壯懷消減怕起中宵舞關心何在
嶺梅開否芳訊遠沈驛路頻搔首青綾寒擁強吟悶句

聲聲慢

秋聲

冷月催砧尖風侵牖滿庭都是秋聲乍歇寒蛩砌蛩斷
續相迎遙天數行新鴈引圓吭蕭蕭宵征無柰是聽荒
雞膈膊壯志還驚 池上蕭蕭送響想敗荷枯葦衆籟
齊生金井梧桐葉疎遠韵偏清芭蕉未經雪壓與松濤
特地爭鳴殘漏急又單于吹徹曉角高城

齊天樂

喜內人挈兩女歸聘

宦游萬里攜家累關心更憐兒女十日相依雙珠未聘
耽閣芳齡誰訴欣聞歸去知幾費經營幾般辛苦多感
山妻將雛曲向鳳絃撫 秋光應念倦旅那堪經遠道
頻歷霜露黔館寒螿湘江新鴈都是添人離緒歸期漫
數盼橘綠橙黃歲華將暮輾轉春來又催登驛路

青玉案 九日登郡後山

秋來雅稱登臨意況此日重陽是獨惜邊關無勝地筍
輿輕穩幔亭高峙賓從隨遊戲 風高落帽高人致末
座難逢孟嘉至試問黃花開也未蟹螯休憶萸囊且佩
莫負登高會

浪淘沙 山行

秋色滿天涯旅興清佳籃輿緩緩遶山斜隔岸霜林紅
不斷深處人家 心繫路偏賒轉入幽遐煙邨錯落半

雲遮牧笛樵歌分隊去暝色歸鴉

祝英臺近

紅葉

茜霞明桃浪妒寒豔竟如許滿眼秋光春色莫相誤爭
愁萬卉霜欺誰知霜後轉染就嫣紅無數 鴈來否更
愛階下亭亭踈影列珊樹柏赤楓丹催得歲華暮因憐
酒客衰顏霜林一樣日日醉斜陽一度

高陽臺

連得梁茵林廉使林少穆齋院手書感賦
茵林書有安得好風吹近一方語故及之

拙甚於鳩忙還似燕年年來趁春風舊壘難依借棲終

歲匆匆滇雲縹緲三千里學浮鷗莫定西東笑萍蹤漂
泊依然蕩落難容 故人念我踈慵甚向千山萬水遠
致郵筒珍重開緘錦書芳意重重多情為盼風吹近柰
好風不庇寒蓬莫書空且倩雙鱗猶望南鴻

漢宮春

茵林來書以漢雙瓦硯拓本緣始索詩賦
此以代硯為紀文達公所貽

漢瓦名齋笑高人佳致冠絕千年鴛鴦舊范況是雙璧
依然師門貽硯念吾鄉故事聯編曾記得銘鐫夾漈好
將嘉話同傳 夾漈草堂硯在林硯樵明府處云
亦紀文達公贈其尊甫樾亭先生 篆就

長生無極想武皇當日志在求仙祗今劫灰已冷片瓦
爭憐錦函檀檟費騷人多少吟牋應笑彼香姜銅雀浪
誇斷甃零甃

踏莎行

檐溜飄堦山雲穿戶重陽過後猶風雨悲秋已自恨無
聊問誰能免添離緒 新鴈不來黃花無語紙窗兀坐
朝還暮可堪窗外有芭蕉聲聲似說新愁苦

減字木蘭花

秋光冷澹已過重陽花始綻雨後離披猶有霜枝護短
籬花前對酒爭道黃花人比瘦人隔天涯憔悴西風
鬢影斜

風入松 喜晴

經旬寒雨鎮無休人意不禁秋朝來乾鵲聲頻噪開窗
望爽氣迎眸澹宕晴雲影疊曠曠曉日光浮 須臾燠
透木棉裘蔀屋喜偏周家家新稻黃雲似篝車滿玉溢
珠流萬寶西成景象千箱南畝歌謳

南歌子 夜柝

雨裏音偏急霜天韻更清也隨寒漏換殘更直伴窗雞
啼旦到天明 遠與吟蜚和高疑警鶴鳴愁人耳畔最
多情每待曉笳吹徹便無聲

解語花 曉行

殘星帶鴈落月啼烏畫角催天曙鞭聲鈴語輪蹄亂迤
邐客程分去衝煙披霧望初日曠曠將吐霜力濃卯酒
全消瘦馬凌競步 試問爲何羈旅被名韁利鎖勾引

如許不辭辛苦奔波狀歷碌那論寒暑宦游更誤念孤
負香衾無數算幾人燠閣黃紬高臥聽衙鼓

綺羅香 東川道中

宿凍封條新寒起粟連日嚴陰催就霧海瀾湧望去欲
迷昏晝聞雞聲知有山居瞥帘影忽來邨口傍郵亭是
處人家帶煙都似乍炊後 西風頻聽夜吼還恐朝來
釀雪客程厮勾曉色熹微誰料碧翁晴透敵霜威卯酒
全消怯風力重裘依舊想歡聲燠遍茆檐負暄多野叟

又 新柳

晴靄烘黃遙波蘸碧偷把春光洩漏非霧非花凝望似
無還有倚東風青眼才舒浥朝雨翠眉將鬪最可憐長
短亭邊嫩條先折玉人手 妝樓頻誤少婦忽向陌頭
瞥見芳心潛逗黛影煙痕慣惹春情倂慙欲藏鶯淺綠
未勻待繫馬柔絲難殼問當年張緒風流可能如此否

蘇幕遮 春草

燒痕蘇酥雨細一遍春風一遍添新翠除卻朱門居要

地廢沼閑庭處處饒生意
妒裙腰粘屐齒若道無情
南浦情何已漫說行人千萬里碧色連天更在行人外

蘭陵王

秋陰

正蕭索連日淒陰漠漠無寥賴秋思惱人溼霧低雲黯
池閣重陽已過卻難博風高帽落東籬畔愁損菊花孤
負登臨對寥廓新寒晚來惡念獨擁青綾歸夢難託
香濃燈罨煙凝幙聽冷鴈音遠瘦蛩吟澀寒聲隱隱送
夜柝把離恨重拓曉覺悵猶昨望樹影迷濛山態冥
邈米家畫幘難描摸想酒興誰遣吟懷無著西風何處
倩爲我掃寂寞

滿庭芳

自題詞存

鐵板高歌紅牙低按佳語分擅詞場笑余迂拙渾不辦
絲簧卻愛倚聲深妙暗偷搯竊效顰妝怡情處花天酒
地隨意譜宮商清狂留幾許零牋賸墨結習難忘向
偷聲減字子細評量縱未盡諧音律半生也曾費吟腸
憑誰付雙鬟試唱紅豆記新腔

小庚詞存

小庚詞存卷一

錢唐任九思棊

